

आकाशवाणी

खबरां ---

1 विदेश मंत्री डॉक्टर एस जयशंकर होंरें अज्ज मॉरीशस दे प्रधानमंत्री प्रविंद कुमार जगननाथ हुंदे कन्नै पोर्ट लुइस च मुलाकात कीती ऐ।

2 डोडा च आतंकवादिणं कन्नै निब्बड़ने आहली कार्रवाई दौरान पंज सुरक्षा कर्मी शहीद होई गए न।

3 राईबाई सरबंधी मंत्री शिवराज सिंह चौहान होंरें आखेआ ऐ जे पैदावार दी मात्रा बदाने लेई साइंसदानें गी सिद्दे करसानें कन्नै संपर्क करना लोड़चदा ऐ।

4 पार्लियामेंट दे बजट इजलास कोला पैहले सरकार नै ऐतवारें सब्बनं पार्टियें दी इक मीटिंग सददी ऐ।

5 मौसम सरबंधी मैहकमे नै गोवा, मध्य महाराष्ट्र, गुजरात, कर्नाटक ते केरल च भारी सवां मती भारी बरखा होने दी पेशगोई कीती ऐ।

Jaishankar Mauritius

विदेश मंत्री डॉ. एस. जयशंकर होंरें अज्ज पोर्ट लुइस च मॉरीशस दे प्रधानमंत्री प्रविंद कुमार जगननाथ हुंदे मुलाकात कीती ऐ। डॉक्टर जयशंकर होंरें श्री जगनाथ होंरें गी प्रधानमंत्री मोदी हुंदी शुभकामनां दित्तियां। उनें भारत मॉरीशस दे खास ते चिर सवां भ्याली आहले रिश्ते दी समीक्षा कीती ते इसी होर निग्गर करने बारै सोच-विचार कीता। डॉक्टर जयशंकर होंरें आखेआ जे उनें भारत-मारीशस दे रिश्ते गी तगड़ा करने ते बरोबर साथ सहयोग करने दी हीक्खी लाई दी ऐ। श्री जगननाथ ते डाक्टर जयशंकर होंरें बड़ा मता असर पाने आहिलियें 12एं सामुदायिक विकास परियोजनाएं दा उद्घाटन कीता। उनें अंतरिक्ष सरबंधी साथ-सहयोग, पाठ्यक्रम शोध लेई राष्ट्रीय संस्थान दे विकास, संस्कृत ते भारतीय दर्शन लेई आई.सी.सी.आर चेयर ते भारतीय अप्रवास सरबंधी लेखागार दा डिजिटलीकरण करने बारै समझौते कीते। डॉक्टर जयशंकर होंरें संयुक्त हाइड्रोग्राफिक सेवा आस्सेआ तैयार मॉरीशस समुंद्री चार्ट दी बिक्री लेई रॉयल्टी भुगतान चेक सौंपेआ।

<><><><><><>

Doda Encounter

डोडा जिले च कल छिडे दे इक्क टाकरे च घायल जम्मू-कश्मीर पुलसै दे इक कर्मी दे अज्ज जखमें दी ताव नेई जरदे होई दम त्रोड़ी देने दे कन्नै गै इस टाकरे च शहीद सुरक्षा कर्मिणं दी गिनतरी 5 होई गई ऐ। डोडा दे घने जंगलें च रात भर चले दे इस टाकरे च फौज दे इक कप्तान सने कुल 5 सुरक्षाकर्मी घायल होई गए हे। एहदे शा पैहले कल जिले दे देसा आले जंगली लाहके च धारी गेट उरारबागी थाहर लाहके गी घेरिए तुपाई अभियान शुरू कीता हा जिस दौरान आतंकवादिएं सुरक्षाबलें पर गोलीबारी कीती ते टाकरा भखी गेआ। रक्षा मंत्री राजनाथ सिंह होरें इस टाकरे च होए दे जानी नुकसान पर गैहरा दुख प्रगट कीता ऐ। सोशल मीडिया पोस्ट च उनें आखेआ जे दुखै दी इस घड़ी च पूरा देश इनें शहीदें दे परिवार आहलें कन्नै खड़ा ऐ। केंद्री मंत्री डॉ. जितेंद्र सिंह होरें बी सोशल मीडिया पोस्ट च लोकें अग्गे अपील कीती ऐ जे ओह जम्मू-कश्मीर च रमानदारी ते सद्भाव बनाई रखने ते दुश्मनै दिएं साजशें गी नाकाम करने लेई इक मिक्क होई जान। जम्मू-कश्मीर दे उपराज्यपाल मनोज सिन्हा होरें बी फौज ते जम्मू-कश्मीर पुलस कर्मियें पर कीते गेदे बुजदलाना हमले पर गैहरा दुख प्रगट कीता ऐ ते उनें शहीदें प्रति श्रद्धांजलि भेंट कीती जिनें देश

दी रक्षा लेई अपनी जिंदू दा बलिदान देई दिता। सेना प्रमुख उपेंद्र
द्विवेदी होरें बी शहीदें प्रति श्रद्धांजलि भेंट करदे होई इस कीमती
जानी नुकसान पर गैहरा दुख प्रगट कीता ऐ। खीरी जानकारी थोने
तगर कार्रवाई अजें जारी ही ते बादू सुरक्षाकर्मी उत्थे भेजे गेदे न।

<><><><><><><>

President Supreme Court

राष्ट्रपति द्रौपदी मुर्मू होरें न्याभूति एन. कोटिश्वर सिंह ते आर.
महादेवन होरेंगी सुप्रीम कोर्ट दा जज नियुक्त कीता ऐ। न्यायमूर्ति
एन. कोटिश्वर सिंह होर मौजूदा समें च जम्मू कश्मीर ते लद्दाख हाई
कोर्ट दे मुख न्याधीश न। न्यामूर्ति आर. महादेवन होर मद्रास
हाईकोर्ट दे जज न।

<><><><><><><>

CBI-NEET

केंद्री तफतीशी ब्यूरो सी.बी.आई नै नीट म्तेहानें च पेपर लीक होने दे
सरबंधै च दऊं होर जनेंगी गिरफ्तार कीता ऐ। झारखंड दे बोकारो दे
इक बसनीक गी पटना सवां गिरफ्तार कीता ऐ ते इक्क होर शख्स गी
हजारीबाग सवां गिरफ्तार कीता गेआ ऐ। एल्लै तोड़ी सीबीआई इस
मामले च 14एं आरोपिणं गी गिरफ्तार करी चुकी दी ऐ।

<><><><><><>

Bihar ED Raid

नियम कादये लागू कराने आहले निदेशालय ई.डी आस्सेआ राष्ट्री जनता दल दे साबका विधायक गुलाब यादव हुंदी बक्ख-बक्ख थाहरें पर छापेमारी कीती जा करदी ऐ। सूत्रें आखेआ जे काले धन गी जायज बनाने सरबंधी मामले च पटना, पुणे ते मधुबनी च बड्डलै 6 बजे किट्ठे छापेमारी कीती गई। ई.डी दे अधिकारी मधुबनी च गुलाब यादव हुंदे जद्दी घरै समेत बक्ख-बक्ख थाहरें पर तलाशी लै करदे न। गुलाब यादव होर 2015 च झांझरपुर असेंबली हल्के सवां विधायक चनोए हे। उनें इस बरे बहुजन समाज पार्टी दी टिकट पर चुनां लड़ेया हा, उयां कामयाब नेई होए हे।

<><><><><><>

Chouhan-Agriculture

राई-बाई ते करसानें दी भलाई-बेहतरी सरबंधी केंद्री मंत्री शिवराज सिंह चौहान होरें आखेआ ऐ जे पैदावार दी मात्रा बदाने लेई साइंसदानें गी करसानें कन्नै सिद्धा संपर्क कायम करना लोड़चदा ऐ। श्री चौहान होर नमीं दिल्ली च राई-बाई शोध सरबंधी भारती कौंसल दे 96में स्थापना ध्याड़े दे उद्घाटन मगरा बोला करदे हे। उनें आखेआ जे करसानें दी

आमदन दोगुणा करने समेत, सरकार आस्सेआ तैय कीते गेदे लक्ष्यें गी हासल करने लेई साइंसदानें, विश्वविद्यालयें, कालजें, कृषि विज्ञान केंद्रें, करसानें गी किट्ठे रलियै कम्म करना होग। श्री चौहान होरें आखेआ जे अज्ज बी अद्दा मुख्य राई-बाई उप्पर निर्भर ऐ ते सरकार एहदे पर पैहल देआ करदी ऐ। मंत्री होरें इस गल्ला दा जिक्र कीता जे मुख्य ना शड़ा अन्नदाने दे उत्पादन च आत्मनिर्भर बनी गेआ ऐ सगुआं मच्छियां पालने ते डेयरी उत्पादन च बी बड़ा बाद्दा ऐ।

<><><><><><><>

All Party Meeting

सरकार नै पार्लियामेंट दे बजट इजलास कोला पैहले ऐतवारें सब्बनें पार्टियें दी इक्क मीटिंग सददी ऐ। मीटिंग दौरान सरकार पार्लियामेंट दे दौनें सदनें दा कम्म रमानदारी कन्नै कराने गी यकीनी बनाने लेई सब्बनें पार्टियें कोला साथ-सहयोग मंगगोग। बजट इजलास इस म्हीने दी 22 तरीक गी शुरू होआ करदा ऐ जेड़े अगले म्हीने दी 12 तरीक तोड़ी चलोग। केंद्री बजट 23 जुलाई गी पेश कीता जाग। नरेंद्र मोदी सरकार दे त्रीये कार्यकाल दा एह पैहला बजट होग।

<><><><><><><>

BJP-Karnatka Govt.

भारती जनता पार्टी नै अज्ज दोष लाया ऐ जे कर्नाटक च पिछले इक्क बरे च कांग्रेस दी हकुमत दौरान घोटालें ते महिलाएं खलाफ हिंसा च बाददा होआ ऐ। केंद्री मंत्री ते पार्टी दे सीनियर लीडर शोभा करंदलाजे होरें नमीं दिल्ली च इक संवाददाता सम्मेलन च आखेआ जे मैसुरु शैहरी विकास प्राद्यिकरण आस्सेआ जिमी अलाटमेंट च बेकायदगियां कीतियां गेदियां न। उनें एह दावा करदे होई राज्य दे मुखमंत्री हुंदे इस्तीफे दी मंग कीती जे सिद्धार्थमैया होर बी इस कथित घोटाले च शामिल न। सुश्री करंदलाजे होरें आखेआ जे कर्नाटक च जनजाति ते दलित समुदाय दे विकास लेई अलाट कीते गेदे पैहे दा बी गलत इस्तेमाल कीता गेआ ऐ।

<><><><><><>

Jatinder Singh

प्रधानमंत्री हुंदे दफ्तरै च राज्यमंत्री डॉ. जितेंद्र सिंह होरें आखेआ ऐ जे प्रधानमंत्री नरेंद्र मोदी हुंदे नेतृत्व च जम्मू-कश्मीर च अरोमा मिशन ते लवैंडर स्टार्ट अप्स गी बड़ा मता बढ़ावा थहोआ ऐ। कल जगटी नगरोटा स्थित आई.आई.एम च एम.बी.ए दे विद्यार्थियें दे नमें बैच गी संबोधित करदे होई डॉ. जितेंद्र सिंह होरें नौजवानें अग्गे अपील

कीती जे ओह स्टार्ट अप मुहिम दा फैयदा ठोआन ते नौकरियां तुप्पने आले बनने दे बजाय आपूं अपना कम्म शुरू करदे होई होरनें गी कम्म देने आहले बनन। उनें आखेआ जे प्रधानमंत्री नरेंद्र मोदी हुंदे अंदर स्टार्ट अप्स गी लेइए बड़ा मता जोश ते दूरदेशी सोच ऐ। उनें आखेआ जे दुनिया दा कोई बी मुख्य अपने सारे नौजवानें गी सरकारी नौकरी उपलब्ध नेई कराई सकदा, इस करिए निजी क्षेत्र च कम्म रोजगार दिएं संभावनाएं दा पता लाना बड़ा जरूरी ऐ ते इत भेठा स्टार्ट अप्स इक अहम भूमिका नभाई सकदे न ते निभा करा बी करदे न। उनें आखेआ जे जम्मू-कश्मीर च अजें बी स्टार्ट अप लेई उपलब्ध संसाधनें दा पूरा-पूरा फैयदा नेई चुक्केया गेआ ऐ ते नां गै इनें संभावनाएं दा पूरा पता लगगी सकेया ऐ पर सरकार हर मौके, हर गुंजैश दा पूरा-पूरा फैयदा नौजवानें तगर पुजाने लेई कोई कसर नेई छोड़ग ते अगले 5एं बरें च इत भेठा पूरी शिद्दत कन्नै कम्म कीता जाग। डॉ. सिंह होरें आखेआ जे अपने 'मन की बात' कार्यक्रम च बी प्रधानमंत्री होरें जम्मू-कश्मीर दे भद्रवाह च कीती जा'रदी लवेंडर दी खेती दा जिक्र कीता ऐते हून एहदी खेती शड़ी जम्मू-कश्मीर च गै नेई हिमालयाई क्षेत्र दे केई होर हिस्सें च बी कीती जा'रदी ऐ। उनें आखेआ जे प्रधानमंत्री होर 26 जनवरी दी परेड च लवेंडर दी खेती बारै झांकी

दिक्खिए मते उत्साहित होए हे। उनें आखेआ जे 2013 च मुल्खे च स्टार्ट अप्स दी गिनतरी मसां कोई साइडे त्रै सौ ही जेहड़ी पिछले 10एं सालें च डेढ लक्ख कोलां पार टप्पी गेदी ऐ।

<><><><><><>

IMD-Forecast

मौसम विभाग नै अगले पंज दिनें दौरान गोवा, मध्य महाराष्ट्र, गुजरात, कर्नाटक ते केरल च बड़ी मती बरखा बरने दी पेशगोई कीती ऐं तेलंगाना, तटीय आंध्र प्रदेश, एम.पी छत्तीसगढ़, ओडशा-नागालैंड, मणिपुर, मिजोरम, त्रिपुरा ते तमिलनाडू च बी इस्सै चाल्ती भारी बरखा होई सकदी ऐ। मैहकमे नै अगले पंज दिनें च हिमाचल प्रदेश, उत्तराखंड, पूर्वी राजस्थान, दिली, उत्तर प्रदेश ते पच्छमी राजस्थान च हल्की थमां दरम्याने दर्जे दी बरखा दे सार दस्से न।

<><><><><><>

Govt. Examination

केंद्र नै राज्यें ते केंद्र शासित प्रदेशों गी आखेआ ऐ जे पुलसा थानें ते पुलस मैहकमें दे नियंत्रण आहली थाहरें गी गवाहें दी जांच गितै थाहरै दे तौरा पर नामित नेंई कीता जाना लोइचदा। केंद्री गृह सचिव अजय भल्ला होरें इस सरबंधै च सब्बनें राज्य मुल्ख सचिवें ते केंद्र शासित

प्रदेशों गी खत लिखेआ ऐ। सब्बने पुलस थाना संचालकें गी आखेआ गेआ ऐ जे ओह भारतीय नागरिक सुरक्षा संहिता 2023 दे तैहत आडियो-वीडियो इलेक्ट्रानिक रायं गवाहें कोला पुच्छ गिच्छ आस्तै बनकदियें थाहरें दी पंछान करन। ध्यानजोग ऐ जे भारतीय दंड संहिता 1860 दी थाहरै त्रै नमें आपराधिक कनून-भारतीय न्या संहिता, भारतीय नागरिक सुरक्षा संहिता ते भारतीय साक्ष्य अधिनियम इस म्हीने दी पहली तरीक थमां लागू होई गेदे न।

<><><><><><><>

Defence-Indigenisation List

सरकार नै रक्षा क्षेत्र च आयात गी घट्ट करने ते आत्मनिर्भरता गी बढ़ावा देने दे मकसद कन्नै 346 चीजें आहली पंजमी मुल्खै च बनी दियें चीजें दी सूचि पी.आई.एल जारी कीती ऐ। इंदे च रणनीतिक तौरा पर महत्वै आहली लाइन रिप्लेसमेंट युनिट, पुर्जे, होर दुए हिस्से ते कच्चा माल शामिल ऐ जिंदी आयात करने पर कीमत तकरीबन इक्क जहार करोड़ रुपें शा बद्द ऐ। रक्षा मंत्रालय नै आखेआ ऐ जे एह समेयान शड़ा भारतीय उद्योग थमां गै खरीदेया जाग। मंत्रालय नै आखेआ ऐ जे जंदे 3 बरें च 12 जहार 300 शा बद्द चीजें-बस्तें दा स्वदेशीकरण कीता गेआ ऐ। नतीजतन रक्षा सार्वजनिक क्षेत्र दे उपक्रमें

घरेलू बपारिये गी कुल 7 जहार 500 करोड़ रपे शा बद्द दे आर्डर कीते न।



India-UN-SDG

भारत दा सतत विकास लक्ष्ये गी हासल करने दी प्रगति च महत्वै आहला जोगदान रेया ऐ। एह गल्ल नीति आयोग दे उपाध्यक्ष सुमन बेरी होरे संयुक्त राष्ट्र च उच्ची सतह आहले सियासी मंच चर्चा च सतत ते समावेशी विकास बक्खी भारत दी बचनबद्धता पर राष्ट्रीय बयान दिंदे होई आक्खी। श्री बेरी होरे गलाया जे भारत अपनिये कोश्टे कन्नै सतत विकास लक्ष्ये दी तरक्की च महत्व आहला जोगदान देने आहला देस रेया ऐ। उने आखेआ जे भारत बड्डे पैमाने पर बुनियादी ते डिजिटल ढांचे दे कामयाब निर्माण, धोखाधड़ी घट्ट करने आस्तै डिजिटल डिलिवरी, समाजी सुरक्षा कार्यक्रम ते महिला सशक्तिकरण पर ध्यान देने च सफल रेया ऐ। भारत नै कुदरती ते इंसानी क्रोपिये कन्नै मकामी ते राष्ट्री सतह पर निब्बड़ने सरबन्धी ढांचे गी होर बी तगड़ा कीता ऐ। श्री बेरी होरे आखेआ जे एह उपलब्धि राज्ये ते केंद्र दी सतह पर सत्ता दे बबस्थित ढंग्गै नै मुंतकिल करने दे कन्नोकन्नी इक्क सहभागी लोकतांत्रिक ढांचे तहत हासिल कीती गई ऐ। उने इस गल्ला

दा बी जिक्र कीता जे बहु आयामी गरीबी सूचकांक पर भारत 2030 दी तय सीमा शा पैहले गै लक्ष्य हासिल करने दी बतै पर ऐ। जलवायु कार्रवाई दे सरबंध्यै च श्री सुमन हौरें आखेआ जे फही जना कार्बन उत्सर्जन सब्बने शा घट्ट होने दे बावजूद भारत नै नमीकरण उर्जा ते घट्ट कार्बन उत्सर्जन आहली अर्थ बवस्था दे निर्माण च व्यापक निवेश कीता ऐ।

<><><><><><>

Trump-Candidates

अमरीका दे साबका राष्ट्रपति डोनाल्ड ट्रम्प हौरें गी राष्ट्रपति दे ओहदे लेई अधिकारिक तौर पर रिपब्लिकन पार्टी दे मेदवार दे तौर पर नामजद कीता गेआ ऐ। कल रातीं मिलवाँकी च रिपब्लिकन नेशनल कमेटी दे नुमाइंदें कोला बहुमत हासिल करने मगरा अधिकारिक तौर पर उंदा नामांकन होई गेआ। 2016 च जित हासिल करने ते 2020 च राष्ट्रपति जो बाइडेन हुंदे कोला हारने मगरा एह ट्रम्प हुंदा लगातार त्रिया नामांकन ऐ। अमरीका च राष्ट्रपति दे चुनां इस बरै नवंबर म्हीने च होने न। श्री ट्रंप हौरें घोषणा कीती जे आहियो दे सीनेटर जे.डी वांस होर उपराष्ट्रपति दे ओहदे लेई मेदवार होंगन। ओह इक्क साबका वेंचर कैपिटलिस्ट ते आत्मकथा हिलनिली एजेंसी दे लेखक न।

